



Inatsisartuni ilaasortamut Aleqa Hammond (Siumut)

Umiatsiaararsorluni aalisartunut atuisunut akiliuteqartitsineq aamma tunisisinnaaneq pillugit apeqqummut nr. 99-imut akissuteqaat.

Inatsisartut suleriaasianni § 36 naapertorlugu aalisarnermut atatillugu atuisunut akiliuteqartitsisarneq pillugu apeqquqarputit. Apeqquq uannut akisassanngortinneqarpoq.

Apeqquq:

Apeqququtigineqartoq tassaavoq umiatsiaararsorluni aalisartoq qaleralinniarsinnaanermut akuersissummut 1.500 kr.-inik akileereersimasoq suannik tunisinissaminut sooq itigartinneqarsimanersoq kiisalu aalisakkanik allanik soorlu saarullinnik qeeqqaniillu.

Akissut:

Aalisakkanik nioqquteqartartut maanna EU-p IUU-mik peqqussutaa naapertorlugu, aalisartut aalisakkanik tuniniaavinnut tunisaminnut akuersissutaat immikkut eqqumaffigniarpaat. Tamanna pissuteqarpoq IUU-imik peqqussutip taaneqartup aalisakkat qaleruallillu EU-p niuerfiinit ilaatinneq ajormagit, tassani nioqqutissiat pineqartut inatsisinik malinnilluni pisinineqartarnerat uppersarneqarsinnaanngikkaangata. Tamanna aalisartup pineqartup aalisakkanik allanik qaleraliunngitsunik tuniseqqusaannginneranut tunngaviusinnaavoq. Ajuusaarnaqaaq pineqartoq suattaminik tunisisinnaasimangimmat, kisianni ilimagineqarsinnaavoq pisumut pissutaasoq tassaasinnasoq, pineqartup aalisakkanut allanut qaleraliunngitsunut aalisarsinnaanermut akuersissuteqannginnera.

Qeeqqat akuersissutitaqanngillat kisianni saarullinnut, qaleralinnut aamma nipisanut akuersissuteqarnissaq inatsisit malillugit piumasaqaataavoq. Taamaattorli inuussutissarsiutigalugu piniarnermut allagartaqartut suanniarnissamut akuersissummik tunineqartarput.

Umiatsiaararsorluni aalisartunut akuersissuteqarfigineqartussamut siullermut qinnuteqarnermi 1.500 kr.-inik akiliinissaq atuuppoq. Tamatuma kingornatigut akuersissuteqarfigineqartussat allat akeqassanngillat, taamaattorli akuersissuteqarfigineqartussanut tamakkununga pisarnertut qinnuteqartoqassaaq.

Umiatsiaararsorluni aalisartup aalisakkanut allanut akuersissummik qinnuteqartussaneranut tunngaviuvoq, Kalaallit Nunaanni Aalisarsinnaanermut Nakkutilliisoqarfiup aalisartut kikkut aalisakkanik sorlernik aalisarnerannik nalunaarsuiffeqarnissaq pisariaqartimmagu.

26. maj 2010
J.nr. 01.28.2010-99
Dok. Nr. 384316

Postboks 269
3900 Nuuk
Tlf. (+299) 34 50 00
Fax (+299) 32 47 04
E-mail: apnn@nanoq.gl
www.nanoq.gl

Aalisarnermut atatillugu atuisunut akiliuteqartitsisarnerup eqqunneqarneranut atatillugu aalisartut pineqartut malittarisassat nutaat pillugit peqqissaartumik paasitinneqarnissaat pingaartinneqarluinnarpoq.

Aalisartut ataasiakkaat aalisakkap siullermik akuersissuteqarfigineqartussaataitaasup pisaarsiareerneratigut akuersissutinut kissaatigisaminnut tulliuuttunut qinnuteqarnissartik eqqumaffigisimangippassuk, ajuusaarnarpoq.

Malittarisassat nutaat atuutilersikkiartuaarnerannut atatillugu ajornartorsiutit pinngitsoortinnissaat ajornartarpoq. Ajornartorsiut allaaserineqartoq atuisunut akiliuteqartitsisarneq pillugu malittarisassanik nutaanik atuutilersitsiartuaarnermut atatillugu ajornartorsiuteqarnermik ersersitsivoq. Ajornartorsiutit taamaattut pinngitsoortinniarlugit pitsaasumik paasisitsiniaanikkut pinaveersimatinneqartussaavoq aamma Aalisarneq, Piniarneq Nunalerinerlu pillugit Naalackersuisoqarfimmi maannakkut siunissamilu malittarisassat tamakkununga tunngasut pillugit pitsaasumik paasisitsiniaasarnissaq anguniarparput.

Inussiarnersumik inuulluaqqusillunga

Ane Hansen

Aalisarnermut, Piniarnermut Nunalerinermullu Naalackersuisoq